


欽定八旗通志

人物志

卷一百

八十五



欽定八旗通志卷一百八十五

人物志六十五

大臣傳五十一

蒙古正黃旗下 德參濟旺 洛
哩 阿賴 巴賴 都爾莽 奈 阿
南達 阿喇納 舒明 薩喇勒 巴圖濟爾噶
勒

德參濟旺

德參濟旺蒙古正黃旗人姓博爾濟吉特世居阿

布罕地方初為察哈爾大臣察哈爾林丹汗不道

天聰六年

上統師往征林丹汗棄故業渡黃河西遁八年復征之林
丹汗沒於大草灘察哈爾亡德參濟旺偕噶爾瑪
濟農多呢庫魯克多爾濟達爾罕諾顏等携衆六
千及家屬來歸

召宴於客瑋

御營德參濟旺率諸臣跪獻酒

諭曰朕本不飲酒念爾新附諸臣誠意當飲盡一卮復酌

酒

親賜之並

賚甲冑衣裳授一等子九年六月察哈爾索木諾台吉率

本部內附

上宴來歸者

賜德參濟旺飲

諭曰察哈爾國之傾覆爾諸臣之來歸朕皆豫知德參濟

旺奏曰

聖諭及此洵有如神之鑿也順治二年以誣告沙濟降爲

三等子三年五月蘇尼特部長騰機思與其弟騰機特等叛奔喀爾喀德參濟旺隨豫親王多鐸追勦至諤特克山喀爾喀土謝圖汗車臣汗各遣兵數萬兩路迎戰我師奮擊大敗之先後斬級俘獲甚衆八月捷

聞

詔下所司察叙九月復德參濟旺一等子世職五年八月

卒子哈爾瑪襲

洛哩 弟沙哩岱

洛哩姓鄂爾沁初爲察哈爾林丹汗護衛天聰六年

太宗文皇帝親統六軍征察哈爾林丹汗驚懼率部衆西渡黃河自竄土默特部尋竄唐古特部而歿洛哩携元初帕斯巴喇嘛所鑄嘛哈噶拉金佛並率百餘人來歸隸蒙古正黃旗子一等輕車都尉世職崇德三年隨貝勒岳託征明由墻子嶺毀邊墻入

擊敗明總督吳阿衡自密雲迎戰兵六年隨大軍圍明錦州敵衆出城拒戰我左翼三旗護軍擊之失利退入壕內敵衆環逼洛哩汎地洛哩奮力拒戰歿於陣

賜卹晉三等男以其兄沙濟襲洛哩有弟二一烏班和碩齊一沙哩岱烏班和碩齊亦於林丹汗歿時自察哈爾率七十人來歸予三等輕車都尉世職既卒沙哩岱襲沙哩岱初任佐領

世祖章皇帝順治元年隨睿親王多爾袞入山海關以步戰擊敗流賊李自成三年隨豫親王多鐸征蘇尼特部騰機斯擊敗土謝圖及碩雷兩汗兵叙功晉二等輕車都尉十五年沙濟卒沙哩岱併襲三等男合爲二等子世襲罔替尋授散秩大臣十八年十二月

聖祖仁皇帝卽位加恩諸大臣之舊自察哈爾來歸者沙哩岱與內大臣噶爾瑪散秩大臣扎木素等並

賜莊田奴僕康熙九年卒以其從弟之子達爾扎襲

阿賴

阿賴姓莽努特世居喀爾喀部

太宗文皇帝時挈家屬來歸隸正黃旗蒙古嘗奉使阿魯
部招降部長數人率衆俱至

上嘉其能

賜號達爾漢優免賦役旣而降人復有叛去者外藩蒙古
諸貝勒追之不及阿賴率兵五百窮追數月斬倡

叛者四人盡俘逃衆以還又率兵征喀木尼喀部
擒其部長葉雷獲戶口牲畜無算崇德元年叙功
授一等輕車都尉兼一雲騎尉世職加

賜號曰庫魯克達爾漢二年授禮部右叅政四年擢正黃
旗蒙古都統六年大軍圍明錦州明總督洪承疇
自松山赴援

上親統師征之阿賴受

方畧設伏杏山路側邀擊敵衆斬殪無算尋攻松山城承

欽定八旗通志 卷一百八十五 五
疇以衆迎戰阿賴率兵沿濠擊敵射殪數人大軍
並進敵退入城不得收降二千餘衆順治元年同
都統葉臣等招撫山西郡邑凱旋

賜白金三百兩三年隨豫親土多鐸征叛逆蒙古騰機思
等將追及賊衆還戰阿賴先率兵繞出其後俟賊
潰遁截擊擒斬甚衆五年同尚書宗室務達海領
兵駐防漢中六年正月叛鎮姜瓖黨姚舉等陷忻
州阿賴移兵赴援破賊石嶺關進復忻州追勦賊

黨屢戰皆捷賊平班師三遇

恩詔晉世職爲二等男九年十月

命領兵駐防西安尋還京以老疾解都統任康熙十二年
諭獎久著勞績諸大臣加阿賴太子太保十七年卒

賜祭葬如典禮諡襄武立碑墓道以其弟之孫高良襲世

職

巴賴都爾莽奈

子哈岱

巴賴都爾莽奈蒙古察哈爾人姓烏彌初爲察哈

爾大臣林丹汗敗奔唐古特巴賴都爾莽奈率二百餘戶駐哈屯河踰一載來歸隸蒙古正黃旗崇德元年授一等男三年隨貝勒岳託征明敗明總兵吳國鎮及內監馮永盛兵敵犯前鋒統領席特庫營率衆擊卻之明年隨大兵攻寧遠城中騎兵出戰迎擊破之六年從征錦州敗洪承疇兵於松山杏山間敵屢犯鑲紅旗營擊之俱潰是年掘壕圍錦州城城內兵突出奮勇逆戰中流矢歿於陣

卹贈三等子越明年以其子哈岱襲爵哈岱年十七隨父擊寧遠兵敵射巴賴都爾莽奈馬斃哈岱不及甲胄馳入陣以所乘馬掖其父騰上步從擊敵借還上聞而嘉之

賚予甚厚旣襲爵從大兵征明敗敵兵於密雲進攻易州順德克之遂畧地至山東臨清

世祖章皇帝順治元年哈岱隨睿親王多爾袞入山海關擊敗流賊李自成二年大兵旣定江南哈岱隨貝

勒博洛征浙江敗敵於海寧縣進攻杭州大破敵
兵師還得

優賚三年隨豫親王多鐸征蘇尼特部騰機思敗土謝圖
及碩雷兩汗兵四年晉二等子六年隨英親王阿
濟格征大同叛鎮姜瓖賊出犯正黃鑲黃兩旗汎
哈岱率所屬兵擊却之又與都統熬拜從濠內擊
其後隊有斬獲九年

恩詔予世襲十二年隨定海大將軍伊爾德征舟山海賊

十三年師次定海縣僑總兵陳六御僑伯阮思於
海島列戰艦以待哈岱同護軍叅領桓達理率兵
進攻賊衆敗北追至衡水洋口連斬賊渠俘其餘
黨舟山平十四年晉一等子康熙十四年

聖祖仁皇帝命爲內大臣明年以討逆藩吳三桂奉

命同侍衛阿喇尼往喀喇沁翁牛特蘇尼特諸部察閱兵
馬調駐大同河南兗州等府事竣還朝十九年以
疾卒年六十有三

賜祭葬諡勤壯立碑墓道孫阿喇納襲雍正元年
世宗憲皇帝追念巴賴都爾莽奈功
詔祀昭忠祠

阿南達

阿南達蒙古正黃旗人姓烏彌三等子巴賴都爾
莽奈之孫內大臣哈岱之次子也初任侍衛由三
等洊擢一等康熙八年輔政大臣鰲拜獲罪拘禁
王大臣等以阿南達素與黨附請革任擬立斬籍

沒得

旨寬免仍任一等侍衛尋兼佐領二十七年噶爾丹侵掠
喀爾喀阿南達奉

命偕喇嘛商南多爾濟齋

敕往諭以休兵和好噶爾丹旋遣使入朝而肆掠如故二
十九年二月

上命阿南達往會喀爾喀諸部兵進剿噶爾丹三月以尚
書阿喇尼代之阿南達還奏噶爾丹爲托多額爾

德尼擊敗窮蹙奔竄至有兩人共一騎及削木爲
仗者請發滿洲勁旅乘機往剿

上命選察哈爾兵六百阿南達率之赴圖拉策應西路都
統額赫訥軍五月阿喇尼奏請移西路軍會剿阿
南達率兵北渡瀚海會

命裕親王福全爲撫遠大將軍阿南達以兵會之八月敗
噶爾丹於烏蘭布通三十一年奉

命赴寧夏招和碩特部台吉巴圖爾額爾克濟農來降是

年十一月擢正黃旗蒙古副都統三十二年二月

上命噶爾丹將取糧哈密

勅郎坦爲昭武將軍備兵寧夏以阿南達屢至邊境偵悉

敵情

命與前鋒統領碩岱同往駐防明年

召還三十五年二月

上親征噶爾丹以撫遠大將軍費揚古率師出西路

命阿南達往喀爾喀諸扎薩克旗分選熟識路徑者二十

人爲嚮導五月
上由中路進征至克魯倫河噶爾丹望見

御營大驚奔竄阿南達同費揚古由圖拉進趨昭莫多聞
噶爾丹遁歸特呼勒濟費揚古令阿南達同前鋒
統領碩岱副都統阿迪等率兵先往挑戰佯卻誘
賊至昭莫多大軍合擊敗賊追逐三十里擒斬無
算噶爾丹引數騎遠竄阿南達赴

行在奏捷

召詢交戰情形阿南達具述其詳復奏言陣獲額魯特人

皆云噶爾丹乍聞哨卒報稱

皇上親征猶不信謂必遣將前來無足懼後有彼所親信
人由大軍縱歸具言

親征果真軍威難敵乃惶懼鼠竄屬下人多怨懟者噶爾
丹亦深以爲悔

上曰此番師出卽奏膚功皆

上天眷佑也乃班師

命阿南達駐守肅州七月

詔移兵邊境偵噶爾丹聲息相機勦撫阿南達尋疏言昆
都倫額濟內諸處各遣官率兵分駐哨探臣親率
巴圖爾額爾克濟農之兵復與提督李林隆商議
增發綠旗兵携子母礮位赴布隆吉爾相度要隘
分置策應乃還肅州

上以所奏示議政諸臣曰阿南達處處備兵朕甚嘉之噶
爾丹之自昭莫多敗竄也其部衆多離散噶爾丹

多爾濟者其妻弟也勢窮蹙持兩端阿南達至布
隆吉爾擒其哨率拜格遣歸招降噶爾丹多爾濟
遂遣使通款阿南達因其使檄諭哈密回人曰聞
逃來人言噶爾丹窮困所屬不及千人無口糧無
冬衣倘來投汝地汝卽擒之令噶爾丹多爾濟助
汝汝勿疑又傳語噶爾丹多爾濟曰哈密若有噶
爾丹聲息報汝汝卽遣人來報一面往助哈密協
力而行十一月阿南達復往布隆吉爾噶爾丹遣

其族姪固蒙多爾濟等與達賴喇嘛青海諸台吉
通問阿南達偵知率兵追及於素爾河擒固蒙多
爾濟等百餘人至肅州并以賊書十四函呈奏三
十六年正月哈密回人擒噶爾丹之子色卜騰巴
勒珠爾等獻軍前阿南達械送至京閏三月疏言
額魯特晉巴徹爾貝來降訊知噶爾丹窮蹙臣請
竭力進征殲滅醜族

上命阿南達與李林隆率甘肅兵二千進勦軍至塔爾河

聞噶爾丹已死其屬下台吉丹濟拉將由巴里坤
竄依策妄阿喇布坦阿南達率兵追之旋奉

詔還駐布隆吉爾以待丹濟拉來歸九月丹濟拉詣哈密
乞降阿南達遣人護送入

覲是年叙昭莫多軍功予雲騎尉世職尋奉

詔率兵駐西寧四十年六月卒於西寧

子祭葬如典禮以次子阿敏多幹襲職雍正三年從其長
子巴里坤副將軍阿喇納請追

賜諡恪敏

阿喇納

阿喇納蒙古正黃旗人姓烏彌副都統阿南達長子康熙十九年襲其祖哈岱一等子爵二十七年授三等待衛洊遷一等待衛五十年任上都達布遜諾爾牧廠總管五十三年授散秩大臣五十五年十月

聖祖仁皇帝命往巴里坤叅贊軍務

諭令揀選入旗察哈爾勁卒並曾隨阿南達出兵舊人共四百名率之以行會駐阿爾台散秩大臣祁里德奏請進勦策妄阿喇布坦

詔阿喇納先往祁里德軍前會同喀爾喀王貝勒貝子公等詳議進兵事宜再赴巴里坤五十六年七月靖逆將軍富寧安由巴里坤分兵三道進勦阿喇納領首隊兵選五百人潛行襲賊邊界至烏蘭烏蘇擒哨賊二人用爲嚮導進兵至烏魯木齊乃還五

十八年七月率兵四千與將軍富寧安分道擊賊邊境至齊克塔木擊破賊營擒斬二十人餘悉降之進次闡展回衆據城守我師奮擊擒一人縱之歸令傳諭城中曰師行討逆非襲擊若等若速歸順赦勿誅否者破城悔無及矣回衆三百餘人皆降遂入吐魯番首目沙克扎珀爾等悉衆降附會富寧安軍於烏蘭烏蘇凱旋六十年六月吐魯番回人托克托瑪木特等以萬餘人駐魯克齊木擊

敗準噶爾兵乞內附阿喇納奉

詔率兵二千往駐吐魯番收撫其衆九月奏請於初冬雨雪時乘賊無備進兵襲擊尋以冬寒不宜深入

諭令偵賊情形就近襲擊是月賊人來犯阿喇納遣侍衛克什圖迎擊而自率兵策應戰甫接阿喇納至分所率兵爲三衝擊賊陣賊不能禦敗入林中舍騎步戰中鎗礮多斃賊大創盡棄軍械馬匹遁我兵追捕數十里擒斬百餘人捷

聞授副將軍仍駐吐魯番六十一年正月

詔議進兵勦賊機宜二月奏言賊進退雖熟踪跡甚輕火器雖多鉛藥甚少我軍慮周而器備勝賊者一賊恃鎗戟少弓箭我軍鋒鈛弓勁勝賊者二賊衆臨陣易敗惟伺隙劫掠我軍部伍整肅無間可乘勝賊者三賊以乘夜盜馬爲得計我軍有備賊不得入勝賊者四賊侵我邊外曠地游牧自謂便易我軍一至賊顧戀妻子牲畜不能一心迎戰勝賊者

五以勁旅直搗伊犁不難掃蕩巢穴惟賊徑甚多處處可以通我駐兵後路賊來一夕可至若遠設汛界被賊攔截輒至消息阻隔卽今所種吐魯番地畝亦須防踐擾請將巴里坤阿爾台兩路大兵移駐烏嚕木齊臣等移駐附近吐魯番險要之地彼此接應既可守護屯田亦可斷賊人潛襲之路其進剿大兵宜分三路阿爾台兵由科布多沿河越額爾齊斯河進發巴里坤兵由烏嚕木齊進發

吐魯番兵由阿勒輝口越那喇特嶺進發賊三路
來迎則勢分易敗若一路拒戰則我以一軍奮擊
趣兩軍直抵其妻子屯駐之地彼必不能兼顧賊
所恃爲險要者三嶺然步行可上非若棧道之難
也所恃以資生者羊牛乳酪然久駐則水草無多
牲畜易竭勢必離散請及時聚糧練兵相機剿滅
疏下議政大臣尋議阿喇納陳奏詳明能得肯綮
我兵屯墾之地防賊潛犯宜令酌留馬兵捍禦擒

勦惟阿爾台至烏魯木齊沙漠間阻二千餘里往
返較遲今賊已竄匿伊犁稍緩則其黨自相疑貳
然後統兵進取爲便

世宗憲皇帝雍正元年七月疏言察哈爾兵久在行間遇
軍營護軍校驍騎校補用但軍中出缺甚少較之
未嘗効力及軍前撤遣之人陞補較遲未爲平允
請下部酌議

諭議政大臣曰自進勦策妄阿喇布坦已經入載凡出征

之京營八旗及盛京黑龍江寧古塔西安右衛滿洲綠旗蒙古察哈爾官兵有久在行間卽應陞用者嗣後令諸路將軍詳加揀選將應陞名冊咨送各旗都統護軍統領及督撫提鎮遇有缺出卽出題補并令揀員署理俟補授之員陞轉時卽以署員請補則行間旣獲陞遷之路卽各營才力可用者亦無慮致嘆積薪其交兵部通諭中外知之九月授阿喇納鑲紅旗蒙古都統仍留駐吐魯番十月進征青海羅卜藏丹津

允撫遠大將軍年羹堯請

命阿喇納率滿洲蒙古綠旗兵二千駐防布隆吉爾二年

三月賊酋阿喇布坦蘇巴泰劫我邊境阿喇納遣

總兵孫繼宗等率兵擊之追奔至推默爾賊兵拒

戰大敗之賊竄還獲牲畜戰械甚衆七月卒於布

隆吉爾遺疏爲其父阿南達請謚部議以副都統

例不予諡格之

特旨如所請行又

諭曰副將軍阿喇納駐軍布隆吉爾宣力有年患病溘逝
朕深爲軫惻加恩於一等子爵外賞給騎都尉世職許
其子并襲於甘肅藩庫內給銀一千兩交與阿喇納之
弟準扎布送櫬回京十一月喪還

命入旗蒙古大臣出城迎奠

子祭葬如典禮諡僖恪以其子伍米泰襲世爵爲三等伯

十年九月禮部以應入賢良祠諸臣列奏

上諭曰阿喇納恪謹持躬忠誠奉職前者西陲用兵宣力

年久收復吐魯番平定青海俱有勞績其應否入祀九
卿會議尋入祀賢良祠乾隆十五年加伯號曰誠毅

舒明

舒明蒙古正黃旗人姓烏梁海濟勒莫特由二等
侍衛擢頭等侍衛乾隆九年授綏遠城副都統十
年調右衛副都統十五年

命辦理青海事務十八年授正白旗滿洲副都統十九
年八月授都察院左副都御史十月兼正黃旗護

軍統領二十年正月赴北路軍營管理輝特台吉等游牧十月授吏部侍郎十一月奏言輝特台吉達瑪林率屬六十餘戶來尋妻父都爾伯特汗策凌請將其屬人編入佐領與策凌同居游牧並封授職銜

上允所請授達瑪林扎薩克台吉十二月以策凌等告稱生計稍艱請移至額克阿喇勒游牧得

旨如所請行二十一年二月偵降曾訥默庫戕臺站倂

衛謀携游牧叛馳奏

勅叅贊大臣阿蘭泰速往擒阿蘭泰奏請調兵防護並遣詢訥默庫同部台吉策凌

諭責其紛紛派兵虞洩漏三月訥默庫就擒上以舒明籌辦妥協阿蘭泰推諉幾至遲誤

命革阿蘭泰男爵給舒明以示鼓勵詳見阿蘭泰傳四月遵

旨偕阿蘭泰編達什達瓦屬爲三旗移阿勒台五月奏

請調扎布堪駐劄兵五百交待衛三都卜領駐布
延圖從之六月奏噶雜特宰桑根敦爲烏梁海所
掠率所屬九十餘戶投誠得

旨根敦著授爲佐領暫與丹畢游牧同居又奏策凌烏
巴什巴圖博羅特及達瑪林等屬人生計艱窘請
賑

諭賞米六百石分給接濟尋奏都爾伯特台吉烏巴什
同伯什阿噶什投誠得

旨伯什阿噶什已封親王烏巴什亦著封爲貝子在額
爾齊斯等處游牧俟明年入覲七月奏內閣侍讀學
士富森帶達什達瓦屬七千五百餘人於六月至
阿拉克綽爾知會臣等指定安插地方查和通鄂
博布拉罕察罕扎輝等處係扎哈沁舊游牧地寬
水草充足已遣主事巴杭阿迎富森等至彼定界
安插報

聞先是舒明奉

旨查和托輝特青滾雜卜叛逆至是奏叛逆已著
命會同親王成袞扎布等擒學八月授叅贊大臣尋奏
青滾雜卜現居游牧其屬移唐努山得

旨唐努山距新烏梁海甚近著舒明選派侍衛數員同
桑寨多爾濟護衛都喇勒遣往新烏梁海曉諭總管
赤倫帶兵協擒九月奏伯什阿噶什烏巴什等屬人
請暫留居哈達青吉勒得

旨前命安插伯什阿噶什屬人於額克阿喇勒地方自

哈達青吉勒移至彼處程途既遠且時屆嚴寒行走
稍艱著卽照舒明所奏辦理尋

諭曰據成袞扎布奏請派科卜多兵二百名交舒明前
往協擒青滾雜卜著卽帶領前往科卜多駐劄兵丁
尚多並著再派三百名令侍衛巴寧阿勤泰會同舒
明前往十月奏言前經成袞扎布遣察哈爾營總圖
炳喀爾喀護衛齊納圖往烏梁海途中獲青滾雜
卜遣往烏梁海之伯爾格等三人臣等訊問據供

青滾雜卜遣赴公丹拜貝子彭楚克處調兵八百名俱不聽且拏送前來等語隨委員解經成袞扎布軍營得

旨伯爾格等現在解送成袞扎布軍營著嚴訊正法新舊烏梁海等並無一人附和青滾雜卜聽其調遣大兵一到即可擒獲著成袞扎布卽速領兵前進勿少遲疑十二月

命同成袞扎布在烏里雅蘇台軍營辦事二十二年授

理藩院侍郎二十三年三月

諭來京署理正白旗蒙古副都統五月以成袞扎布奏請令舒明帶左副將軍印回烏里雅蘇台辦事九月奏稱俄羅斯界所設阿噶爾等卡倫爲和托輝特之烏梁海等賊奪馬駝傷兵丁已派喀爾喀台吉達瑪林扎卜等同和托輝特扎薩克達什朋楚克協擒得

旨著傳諭成袞扎布於北路索倫兵內酌量帶領進勦

或卽於喀爾喀派老成歷練之人以所部兵丁追獲渠魁正法示衆不可致令漏網二十五年三月授歸

化城都統九月

命暫署綏遠城將軍印務二十六年十一月授綏遠城

將軍兼署歸化城都統十二月

陛見二十七年正月卒子雅滿泰襲三等男官正白旗

蒙古副都統

命往西藏辦事五十三年廓爾喀擾後藏界雅滿泰措

置乖方

詔革職給筆帖式五十五年三月授頭等侍衛五月

命協辦西藏事務五十六年九月以廓爾喀復擾藏界

詔革職枷責

薩喇勒

薩喇勒額魯特人初爲準噶爾台吉達什達瓦宰

桑乾隆十五年準噶爾內亂薩喇勒率屬四十七

戶投誠

欽定八旗通志 卷一百八十五
詔安置察哈爾隸蒙古正黃旗尋授散秩大臣十七年
準噶爾台吉喇嘛達爾扎請遣薩喇勒還

上不許十八年

命授北路軍營叅贊大臣十九年正月率兵五百擒擅
入卡倫之烏梁海得木齊扎木叅等于科布多

諭曰薩喇勒感戴朕恩遵奉指示無忝任使甚屬可嘉
著加恩補授內大臣尋

命收烏梁海衆當薩喇勒擒扎木叅時釋還收凌朔岱

訥庫勒等十人至是告稱宰桑雅爾都得木齊阿

茂海欲來歸乞駐牧烏蘭固木克木克木齊吉薩喇

勒飭其親至許駐特斯河不則駐之阿爾台山之

外並請發額魯特兵聽調尚書舒赫德以爲未便

諭曰薩喇勒辦理招諭驅逐烏梁海事宜頗屬奮勉軍

營將軍大臣等劄付不合機宜薩喇勒未免掣肘新

降杜爾伯特車凌之人卽調遣亦無不可但游牧未

定或致逃竄於事無益著舒赫德會同薩喇勒車凌

金定人於進志 卷一百八十五
等議將伊屬下最可信任之塞卜騰等台吉宰桑酌
派數員領兵一二百名再令御前侍衛永柱會同總
管阿敏道揀派察哈爾八旗兵五百名帶領交與薩
喇勒爲招諭驅逐之用薩喇勒係熟悉此路之人相
機行事務期迅速成功不必照將軍大臣等所飭固
執而行三月薩喇勒兵至卓克索烏梁海宰桑雅爾
都車根赤倫察達克圖布慎瑪濟岱各鄂拓克竄
徙阿爾台山外薩喇勒奏烏梁海等已遠遁但貪

戀故土必仍回牧彼時整兵速出易於收服請暫
撤兵還

允之是月

命薩喇勒來京面領

諭旨再赴軍營六月

諭曰今年春薩喇勒等帶兵驅逐準噶爾之烏梁海等
俱已遠避我兵旣撤伊等或潛回原處明年大兵進
剿準噶爾倘伊等暗送信與準夷或乘間肆竊俱有

關係應卽遣兵先爲辦理薩喇勒等到軍營時著公同酌辦七月輝特台吉阿睦爾撒納來降

命薩喇勒迎勞頒賞九月偕喀爾喀貝子車木楚克扎布等率兵千八百擊前竄徙之雅爾都車根赤倫察達克四宰桑於察罕烏蘇薩喇勒先得勝獲馬牛羊無算先是有扎哈沁宰桑庫克新禡木特者犯卡倫追之弗獲達青阿誘執之

上罪其不武令縱之去禡木特移牧布拉罕察罕托輝不卽降道遇通禡木特被擒繫之諾海克小特爾薩喇勒偵知之十月由烏蘭山後掩擒通禡木特並獲庫克新禡木特送軍營安置其戶畜于庫卜克爾克勒事

聞

諭曰薩喇勒遇事奮勉此次首先進取克成此功著賞給世襲子爵補授正白旗領侍衛內大臣時定議征達瓦齊

命薩喇勒爲定邊右副將軍二十年正月

詔領哨探兵同叅贊大臣鄂容安等由西路進征

諭鄂容安曰新額魯特進兵時肆行搶掠北路將軍班第業經奏聞朕已曉諭定邊左副將軍阿睦爾撒納等西路哨探兵前進亦宜禁止薩喇勒之兄現在彼處如給伊微物及伊屬下畧爲饋遺可無深究若過分貪掠鄂容安卽以已意提撕薩喇勒一經指示自當欽戢鄂容安其審擇輕重留心辦理又

諭薩喇勒曰阿睦爾撒納以托忒字奏請將伊游牧移

居烏里雅蘇台等處朕以事屬可行已准其請惟奏

請印文招降伊輝特屬人一事是其欲取多人占據

地方之意已經微露似平定準噶爾專爲伊一人集

事矣薩喇勒到彼務須留心防範慎勿任其所行然

亦不可稍爲洩漏此時進兵愈速愈妥薩喇勒其善

體朕意二月薩喇勒等疏報扎哈沁得木齊巴哈曼

集以三百餘戶宰桑敦多克以千餘戶來降隨宣

欽定八旗通志 卷一百八十五
三
敕諭令安居毋恐

上獎妥協

命北路投誠人員照此辦理薩喇勒復遣侍衛瑚集圖
賚

敕諭達瓦齊同族台吉噶爾藏多爾濟尋率台吉諾海
奇齊等三十餘人來降

詔封爲綽囉斯汗

諭曰據薩喇勒奏準噶爾大台吉噶爾藏多爾濟率衆

投誠看來大功告成在指顧間不勝欣慰薩喇勒遵
朕訓示動合機宜俟成功後加恩優叙先將朕所佩
荷包賜予並賞給雙眼翎以示優獎又

諭曰薩喇勒等奏帶領噶爾藏多爾濟投誠人等前進
又羈留達瓦齊來使帶往進發辦理悉中機宜伊奏
內有噶爾藏多爾濟心迹叵測之語朕思噶爾藏多
爾濟雖不可深信旣已投誠帶兵同進諒無意外之
虞若防範太過恐伊反生貳心惟有示以大度默化

其疑懼之意而已三月薩喇勒疏言臣前奏請俟將軍永常到烏魯木齊將臣所領疲乏兵裁駐交伊統領爲聲援增派和託輝特等兵起程仍飭索倫兵殿後其餘各隊俱徐行息馬力以張聲威據阿睦爾撒納咨北路兵業經起程臣密奉

諭旨令西北兩路哨探兵于博囉塔拉會合進剿毋令北路先發今若照臣原奏俟永常到起程必在北路之後臣等一面飛檄永常令督催和託輝特及

索倫兵速進一面於寧夏涼州莊浪滿洲兵內揀選驍壯馬可至伊犁者派兵四百令和起齊努渾帶領臣等同進發復商派新降台吉噶爾藏多爾濟兵三百其姪扎那噶爾布兵六十噶勒雜特宰桑哈薩克錫喇兵五十輝特台吉巴雅爾等兵五十扎哈沁宰桑敦多克兵三百呼爾璊台吉納穆奇兵三百于三月二十七日自羅克倫啟行計程四月十五日可抵博囉塔拉合北路大軍四月疏

言臣等領兵前進招撫各部人衆綽羅斯台吉袁布扎卜及弟三濟扎卜布庫努特台吉巴爾珠爾當扎木素呼爾璊台吉納木喀喇木錐阿巴噶斯哈丹得木濟普爾普及吐魯番伯克莽阿里克等皆率屬來降共四千餘戶葉爾羌喀什噶爾和卓木獻玉盤一願爲臣僕各令回原牧再新降輝特台吉巴雅爾等請給地耕牧臣等如所請令往吐魯番莽阿里克處領取又將阿睦爾撒納屬人二

百餘及額林哈里爾噶窮夷八百餘戶俱附有牲畜之扎哈沁宰桑敦多克等屬下給籽種令其耕牧臣等由羅克倫啟行噶爾藏多爾濟率娃扎那噶爾布隨營効力形迹尚無可疑且將軍永額現駐烏魯木齊而和託輝特台吉旺布多爾濟額魯特公丹拜及索倫巴爾呼兵續進應援防範周密彼亦不能乘隙覬覦臣等辦理諸事留數日此際達瓦齊想已得兩路進兵之信若不遣人招服恐

其遠颺因繕檄曉諭利害飭侍衛塔奇圖及臣薩喇勒屬前鋒策稜等由烏蘭烏蘓先往傳諭兩疏

入

詔獎薩喇勒等畫妥協以

御用寶石朝珠

賜之薩喇勒兵至額林哈畢爾噶察新降諸台吉宰桑

有不願噶爾藏多爾濟爲汗意疏請停頒

諭旨又言新降人編旗分佐領若按戶清查恐致驚疑

令各將所屬戶口開報卽交伊等管束

諭曰薩喇勒相機酌辦甚可嘉予著卽傳諭玉保將朕所降封噶爾藏多爾濟爲汗之旨不必宣諭薩喇勒自進兵以來諸事奮勉又能詳察彼衆情形爲此陳奏甚合機宜不特額林哈畢爾噶等處台吉宰桑情有不願倘準噶爾全部誤認以噶爾藏多爾濟代達瓦齊爲汗輾轉傳播關係甚大今暫行停止不卽宣諭則衆人俱無猜疑于進兵事宜大有裨益薩喇勒

著賞銀一千兩卽遣人送至伊游牧處以示鼓勵尋
諭曰據薩喇勒奏領兵已過博羅布爾噶蘇台至登努
勒台達瓦齊所屬並無一人防守其伊犁附近之台
吉宰桑喇嘛等已遣人前往招降所辦機宜悉協不
勝欣慰至所奏功成後請停止伊犁駐兵一事薩喇
勒等蓋因準噶爾近年以來生計窮蹙若多駐官兵
恐不無勞費起見耳朕前此諭令駐兵原非欲令久
戍以現辦四衛拉特旗分佐領并五集賽各鄂拓克

及哈薩克布魯特邊界一切事宜若不令大臣駐劄
遇有應行查辦之事無所統率究屬未協且旣駐大
臣不能不酌量駐兵備差遣著班第薩喇勒等至伊
犁時會同妥議具奏是月薩喇勒等旣抵登努勒台
將軍班第等亦至尼楚袞兩路大軍合時達瓦齊
居伊犁河西之格登槽不設備五月西路大軍由
喀塔克渡口越克特滿嶺北路大軍由固勒扎渡
口越推墨爾里克嶺直抵格登達瓦齊驚遁未幾

就擒伊犁平

詔封薩喇勒一等公

賜超勇號

賞寶石頂四團龍服六月撤大軍還

命阿睦爾撒納入

覲薩喇勒同班第鄂容安駐守伊犁班第等奏准留察

哈爾兵三百喀爾喀兵二百備差遣尋

諭曰侍衛濟福回京奏稱薩喇勒聞知伊子信息惟以

進擒達瓦齊爲事並未遣人往尋等語薩喇勒出力

奮勉不以私事廢公實能明曉大義朕心深爲嘉予

此時伊子玉魯斯諒已回至游牧著加恩授爲三等

侍衛此朕特加優眷傳諭薩喇勒知之七月班第奏

薩喇勒與阿睦爾撒納皆私取達瓦齊牧畜什物

彼此甚不協

諭曰薩喇勒歸順已久受恩深厚諒必不至有僭妄悖

逆之事若因此等小節疑而不用何以收羣策之力

卽以掠取牲畜什物而論薩喇勒必不至如阿睦爾
撒納之甚班第等惟當開誠相示據理阻止薩喇勒
自必聽從是時阿睦爾撒納謀叛逗遛途中班第等
屢疏入告薩喇勒亦以爲言

上密諭諸臣擒治弗能決八月阿睦爾撒納叛遁逆黨
克什木等作亂班第鄂容安被陷死之薩喇勒爲
烏魯特宰桑納親哈什哈之子錫克錫爾格所羈
不得歸十二月薩喇勒遣其兄布林等至巴里坤

辦事大臣和起所告稱阿睦爾撒納現在博羅塔
拉道都託羅海薩喇勒商同伊犁台吉宰桑等由
託和木圖往擊和起以

聞

諭曰薩喇勒駐劄伊犁倉猝遇賊爲賊拘留自必愧恨
然因兵少力弱中賊詭計被執今伊感念重恩會同
伊犁衆台吉宰桑等分路領兵期獻逆賊是其誠心
奮勉始終不渝朕聞之實深嘉予轉復爲之惻然著

將軍策楞傳旨慰勞並將荷包鼻煙壺各一件俟薩喇勒至軍營時卽行頒賜又諭曰薩喇勒原係額魯特人叩關投誠甫及五年隨圍出兵奔走幾無寧歲前此命其同駐伊犁亦因伊熟彼地情形耳及阿睦爾撒納背叛生變班第鄂容安捐軀盡節而薩喇勒衝陣突出其後力窮被拘留所以不加深咎者誠以額魯特風俗原不知致身大義未可以世受國恩之滿漢臣子相提並論初非朕之

溺愛額魯特而然也拘方之士或將謂三人同駐伊犁彼二臣臨危致命而伊乃覲顏就執其偷生負國斷難姑容如此則是以祖父世臣受恩深重明于大義者爲比未免過于求全責備而其視薩喇勒爲過高矣夫責人易而當局難平居議論誰則不能獨不思身當其境可深信其能引決就義如班第鄂容安所爲者恐亦未能多得也俟阿睦爾撒納擒獲之日朕自分別加罪另降諭旨尋

命司員唐喀祿經理薩喇勒游牧二十一年正月薩喇勒至吐魯番遣人通信巴里坤叅贊大臣達勒黨阿率兵往會二月奏言臣蒙委任駐劄伊犁遇賊竊發不能盡力勦滅致將軍叅贊大臣等捐軀盡節臣力窮被執自知徒死不足塞責隱忍偷生希圖報効遂與台吉諾爾布敦多克等聚兵欲擒逆賊阿睦爾撒納自贖前愆上年十二月內與阿睦爾撒納交戰數日不勝隨同諾爾布敦多克等由

吐魯番前來據伯克莽阿里克言噶爾藏多爾濟欲俟擒獲阿睦爾撒納立子諾爾布林沁爲總台吉轄四衛拉特又巴雅爾等知臣至吐魯番帶兵突來意不可測幸臣先入城聞巴里坤調兵將至始回準噶爾人反覆變亂全不可信必調西北兩路兵三四萬併力勦擒逆賊並將各部落人等分別勦撫其準噶爾兵似不可用疏入

諭曰此次薩喇勒甚有畏懼準噶爾之心又恐來京治

罪是以故難其說爲此陳奏今大兵將抵伊犁若如所奏必待大兵三四萬始可前進則機會已失必致墮賊奸計因降旨令其卽同達勒黨阿進勦然伊旣懷疑懼未必能盡心擒賊以圖報効將軍策楞等竟不必俟薩喇勒偕行卽薩喇勒趕赴一切緊要機宜不必與之商酌尋

諭薩喇勒駐特訥格爾辦事仍授定邊右副將軍三月命由巴里坤來京策楞奏言侍衛巴寧阿自伊犁回至

軍營告稱上年八月二十三日賊掠臺站將軍班第等由固爾扎赴崆格斯禦之賊甫至薩喇勒欲奔叅贊大臣鄂容安云賊來當戰胡急走薩喇勒答云爾何知遂策馬而行喀爾喀察哈爾等俱隨之去將軍處止司員侍衛及兵丁六十人是夜賊濫聚將軍等遂各自盡疏入

諭曰薩喇勒與班第同爲將軍自當奮力禦賊果至勢窮力絀班第等先以身殉薩喇勒或不得已衝突而

出不識死綏之義尚不足責乃竟首先奔竄以致大
眾潰散是一臣雖死于賊而薩喇勒亦不能無罪但
係巴寧阿一面之辭應將薩喇勒解京質對著傳諭
黃廷桂俟薩喇勒至肅州時卽鎗拏速行押解來京
嗣薩喇勒至供逃出是實

命革職永遠監禁

諭曰班第鄂容安同薩喇勒駐守伊犁當逆賊叛亂之
時班第鄂容安捐軀殉節而薩喇勒獨自脫逃及拏

解來京朕親加審訊據稱彼時以賊衆四集恐力不
能支是以帶兵逃出冀圖再舉等語朕因其所言情
節尚應質對今巴寧阿栢琨等到京質訊之下言頗
相符但供拔去所賜孔雀翎而逃是其偷生負國已
屬顯然在滿漢世受國恩之臣而臨難苟免自當明
正典刑伊係額魯特新附之人不足責以死綏大義
今班第鄂容安靈櫬已到朕親臨祭奠優于卹典靈
櫬俱令進城卽著旺扎爾帶同薩喇勒前往班第鄂

容安樞前將逆黨克什木等先行馘耳祭奠令薩喇勒在旁看視夫人孰無死使薩喇勒亦能如二臣之決計就義則今日哀榮之典自當一體同受而乃顛越至此使伊稍有人心能無愧乎二十二年

諭曰薩喇勒當額魯特變亂時觀望畏縮不能奮勇復讐是以降旨拏問但伊曾奏及巴雅爾雖降必叛其言頗驗今巴雅爾等既已生擒扎那噶爾布亦經獻馘哈薩克阿布賚率屬歸誠計阿睦爾撒納自可且

夕俘獲著將此等情節傳諭薩喇勒施恩免罪出獄從前賞給瑪木特房屋令其居住二十四年六月復授散秩大臣鑲白旗蒙古副都統

命乾清門行走八月授內大臣

賞二等超勇伯爵二十五年卒

諭曰內大臣薩喇勒人頗篤實効力有年今患病溘逝深爲軫惻著加恩派散秩大臣一員侍衛十員往奠茶酒仍賞銀一千兩辦理喪事二十六年

命圖形

紫光閣

御製贊曰彼中宰桑識時早歸副帥以往克贊戎機拔
身戰出不忘本朝云胡不死責備則澆子玉魯斯襲
伯爵

巴圖濟爾噶勒

巴圖濟爾噶勒額魯特人乾隆十九年以杜爾伯
特宰桑投誠隸蒙古正黃旗二十年五月大師

征準噶爾達瓦齊擁眾萬人踞格登山崖巴圖濟
爾噶勒與翼領喀喇巴圖魯阿玉錫新降宰桑察
哈什以兵二十餘往探乘夜衝入大軍繼進賊驚
潰達瓦齊遁收所居大蒙古包及礮六降其台吉
二十宰桑四親兵五百兵四千餘

諭曰喀喇巴圖魯阿玉錫巴圖濟爾噶勒察哈什等遵
令乘夜翻營一鼓先登所向披靡尤爲實力奮勉俱
加恩授爲散秩大臣加賞男爵世襲八月阿睦爾撒

納叛阿玉錫奏巴圖濟爾噶勒黨惡執之
諭歸部管轄十一月額魯特侍衛丹津告訥默庫欲逃
叛

命辦事大臣阿蘭泰擒治并將巴圖濟爾噶勒拏解來
京二十一年三月巴圖濟爾噶勒將訥默庫背叛
情形據實陳奏免其治罪加

恩授三等侍衛五月擢頭等侍衛赴達勒黨阿軍營十
一月達勒黨阿奏其効力有勞授散秩大臣二十

二年十月解馬赴濟爾哈朗

命為領隊大臣授鑲藍旗蒙古副都統十一月在哨探
隊內行走二十三年與侍衛鄂實圍扎哈沁得木
齊哈勒拜游牧擒斬哈勒拜及其屬襲執叛賊琿
齊于尼勒喀河盡收其游牧四月擒噶勒禰特宰
桑特克勒德克隨將軍兆惠等由伊犁進剿回部
五月至善塔斯嶺招降布魯特頭人並其屬六十
餘又降阿勒巴齊鄂勒椿等收其馬駝軍械八月

招撫塔拉斯布魯特三百餘戶十月

諭曰巴圖濟爾噶勒原在富德隊內不必隨往葉爾羌
卽同巴祿領兵搜捕哈丹阿巴噶斯餘賊及沿途嗎
哈沁等凡奏事行文列名于次不必受巴祿節制巴
祿與巴圖濟爾噶勒當和衷協力以期集事若能盡
勦餘孽併獲哈薩克錫喇則真伊二人之福也十一

月

命速赴富德軍營十二月至伊拉里克因馬駝未至兵

皆負糧械徒行巴圖濟爾噶勒奏將已到闕展之
駝僭送續到者速爲接濟得

旨嘉獎二十四年正月兵至阿爾吉什時逆賊霍集占

黨侵和闐侍衛齊凌扎布請援將軍兆惠令巴圖

濟爾噶勒與瑚爾起往擊之三月至和闐賊望風

遁偵賊騎七百餘屯踞博羅齊乘霧直前衝擊潰

之追越阜窪勒河勦殺百餘收回人四千餘戶撫

定齊喇塔克克里雅三城

御製博羅行紀其事

詩曰博羅齊者鄰和闐賊狃據險偵我軍先是圍解黑
水困元戎遣救掄二臣一爲瑚爾起吉林舊族世受
恩一巴圖濟爾噶勒乃額魯特宰桑其勇誠超羣同
心協力速赴援率軍數不能盈千途歷戈壁不毛之
地負甲步進無俄延哈拉哈什已垂陷齊凌扎布馳
來言夜急行至伊立齊時賊望風先逃奔集兵拯哈
拉哈什賴天大霧彌漫漫乘霧直搗賊營後伺怠奮

勇攻中堅斬將奪旗獲輜重孤城恢復餘俱安昔薛
延陀禱神能致雪冀困李勣終乃自敝焉此霧或亦
敵鮮荅翻爲我用成功全易云天所助者順向猶未
信今信然持盈知足感

帝佑敢肆志詡能開邊尋下部議敘給雲騎尉世職七月

霍集占棄葉爾羌遁追及於阿勒楚爾賊伏兩山
間我兵分三隊奮擊巴圖濟爾噶勒領左翼自辰
至午賊大潰追殺千餘生擒五十奪礮械無算賊

逸入巴達克山界巴圖濟爾噶勒與伊柱領兵八
百于山後堵禦大兵尾至伊西勒庫爾淖爾賊據
險守我師整隊發礮樹回燾降賊萬餘巴圖濟爾
噶勒以功

賞戴花翎給白金九月富德令侍衛賽音圖等往巴達
克山勒獻霍集占派巴圖濟爾噶勒駐兵卡倫張
聲勢瓦罕伯克以戶口降二十五年凱旋
賚金幣授內大臣

命圖形

紫光閣

御製贊曰杜爾伯特部中傑驍嘉其心直授職本朝凡
與交戰義弗返顧師濟和闐不孤恩遇嗣追敘不定
準噶爾及回部功加騎都尉三十四年授公中佐
領三十七年卒

賜祭葬如例子二長綽克圖襲騎都尉兼一雲騎尉次
普爾普由侍衛隨征金川有功授三等奮勇男官

護軍統領以勦臺灣逆匪林爽文奉

旨加給雲騎尉五十五年卒

賜祭葬如例

欽定八旗通志卷一百八十五

